



Markus Ritter (a san.), il cusseglier naziunal e president dals purs svizzers cun Duri Campell, il nov cusseglier naziunal grischun.



Cusseglier naziunal Martin Candinas cun Viola Amherd, la cussegliera naziunala dal Vallais.

«Far politica reala e betg da partida»

Duri Campell e ses emprim di a Berna

DA GION NUTEGN STGIER / ANR

■ **In pau nervus era Duri Campell, il nov cusseglier naziunal da la pbd bain, ier la damaun durant il viadi cun il tren dal Grischun en la chapitala svizra. El haja dentant grond plaschair da far part dal parlament svizzer, tema haja el betg, però respect da ses nov uffizi.** Dapi ils 2003 è *Duri Campell* stà en il cussegl grond sco substitut deputà e quai permanent e lura a partir dal 2006 sco deputà. Il 2014 è l'Engiadinais daventà president dal cussegl grond ed ils 18 d'october da quest onn ha il suveran grischun elegì l'um da 52 en il cussegl naziunal e successur da *Hansjörg Hassler* ch'è stà 16 onns cusseglier naziunal. Ier avain nus accompagnà Duri Campell a Berna per guardar ad el sur ils givis.

Gia l'emprim incap

Il viadi cun il tren da Cuir a Berna cunza in pau dapli che duas uras. Per Duri Campell ha dentant ses emprim viadi a la sessiun cuzzà bunamain 30 minutas pi ditg. In incap tecnic tar la viafier naziunala è stà la raschun per quai. En quel temp da spetga ha el gist nizzegià l'occaiun da consultar ils numerus «sms» ed «e-mails» dals amis da partida cun ils buns giavischs per ses emprim di sco cusseglier naziunal. Curt avant Turitg ha il pur da Chinuos-chel anc telefonà cun ses famegl per dar tras las da-

vosas ordinaziuns. «El è propi in um fitg serius ed in famegl che guarda fitg bain dal manaschi puril», manegia Duri Campell. Pauc suenter è l'Engiadinais lura stà per intginas minutas al telefon cun in redactor dal schurnal regiunal dad «SRF». Tranter Turitg e Berna finalmain ha Duri Campell chattà temp per mangiar in «sandwich» e baiver in café.

«Hotel figlia» e na en il «Bellevue»

Exact per l'emprim di da la sessiun d'enviern ha Duri Campell er retschet l'abunnamment general da la Viafier svizra, il «GA» e betg in di pli baud. Strusch arrivà a Berna ha el inscuntrà *Markus Ritter*, il cusseglier naziunal da Son Gagl e president dals purs svizzers. El ha bainspert fatg attent Duri Campell da na mancar a la seduta dals purs e cussegliers naziunals en la chasa federala. Cuntrari ad auters parlamentararis ha l'Engiadinais betg quartier en in dals hotels da luxus a Berna, mabain stat el sur notg tar sia figlia *Madlaina Campell* e ses partenari *Rafael Ratti*. «Jau sun ventiraivel da pudair star tar mia figlia ed almain la saira avair in pau atmosfera privata», punctuescha Duri Campell. Aposta per quella raschun haja la matta tschertga ina abitaziun pli gronda.

Betg per adiever

Duri Campell è sa preparà bain sin il ses nov uffizi. El ha frequentà in seminari

da la ETH per novizs dal cussegl naziunal ed er stà al di da scolaziun, infurraziun ed instrucziun en la chasa federala. Survegna ha el er in uschenumnà «Laptop» ed ina adressa dad «e-mail», dentant dastga Duri Campell betg nizzegiar quella per comunicaziun privata. Anc sappia el betg a tge persunas ch'el vegnia a dar sias duas entradas per la chasa federala, g'è dumondas per quels «Badges» haja el g'intginas.

En duas cumissiuns

Il nov cusseglier naziunal sesa en il parlament sin il plaz cun il numer 57 e dad ina vart ha el in ami da partida e da l'otra vart ina represchentanta dals verliberals. En quella sessiun vegnia el strusch a prender il pled, plitost be udir e perseguitar il decurs da la sessiun. En il cussegl grond a Cuir saja bain pli amiaivel che en la sala dal cussegl naziunal, nua ch'i vegnia discurrì pli direct, pi dir e pli serius. Il discurrer surlaschia el anc a la scheffa da fracziun *Rosmarie Quadranti* ubain al pledader da la fracziun. El vegnia a far part da duas cumissiuns, a la cumissiun da gestiun ed a la cumissiun per fatgs statals. Las actas haja el studegià main e plaschair haja el betg ch'il cussegl federal vulesse reducir las contribuziuns per il turissem e per l'agricultura. Suenter ils uschenumnads «Hearings» sa decida el a quel candidat da la pps da dar la vusch tar las tscherans dal cussegl federal.



Martina Werro e Roman Schmid dad RTR han accompagnà Duri Campell a Berna per rapportar per il Telesguard. FOTOS G. N. STGIER



Bainvegna a Berna: Toni Brunner (a san.), il president da la pps svizra, salida il nov cusseglier naziunal Claudio Zanetti da Turitg ed uriund da Poschivo.



Han cumenzà lur segunda perioda da la legislatura sco cussegliers dals chantuns: Matrin Schmid (a san.) e Stefan Engler.



Resta cusseglier naziunal e daventa betg cusseglier federal: Heinz Brand.